

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

दिनांक 05.10.2024

18.10 शनिवार

प्रमुख समाचार –

- 1— प्रधानमंत्री नरेंद्र मोदी ह आज महाराष्ट्र के वाशिम ले लगभग तेईस हजार तीन सौ करोड़ रुपिया के कई ठन विकास परियोजना मनके करीन सुभारंभ— पीएम—किसान योजना के अट्टारहवीं किस्त घलो करीन जारी।
- 2— धमतरी के पंडित रविशंकर शुक्ल जलासय गंगरेल बांध म आज प्रदेश के सबले बड़े जल महोत्सव के होंगे सुभारंभ —जल संचय अउ जल संरक्षण उपर करे जात हे विचार विमर्स।
- 3— मुख्यमंत्री विष्णुदेव साय ह आज राजधानी रायपुर के साईस कॉलेज मैदान म सशस्त्र सैन्य प्रदर्शनी के करीन सुभारंभ।

समाचार विस्तार ले

प्रधानमंत्री—पीएम किसान सम्मान निधि

प्रधानमंत्री नरेंद्र मोदी ह आज महाराष्ट्र के वाशिम ले लगभग तेईस हजार तीन सौ करोड़ रुपिया के कई ठन विकास परियोजना मनके सुभारंभ करीन। श्री मोदी ह पीएम—किसान योजना के अट्टारहवीं किस्त घलो जारी करीन। ए मउका म ओमन किहीन कि देस भर म नौ करोड़ चार लाख ले जादा किसान मन ल बीस हजार करोड़ रुपिया ले जादा के रासि के प्रत्यक्ष वित्तीय लाभ मिले हे।

मुख्यमंत्री विष्णुदेव साय ह राजधानी रायपुर के साईस कॉलेज मैदान ले प्रधानमंत्री किसान सम्मान निधि के कारीकरम म वर्चुअली सामिल होइन्। ए मउका म श्री साय ह प्रदेस के करीब पच्चीस लाख किसान मनके खाता म पांच सौ छियासठ करोड़ ससत्तर लाख रूपिया ले जादा के रासि अंतरिम होय उपर प्रधानमंत्री ल आभार व्यक्त करीन। ओमन प्रदेस के किसान मन ल बधई अउ सुभकामना दीन। ओमन किहीन कि प्रधानमंत्री श्री मोदी के नेतृत्व म देस म किसान मनके उन्नति, जय—जवान—जय किसान के नारा ल सार्थक करत हे।

जल जगार महोत्सव

धमतरी के पंडित रविशंकर शुक्ल जलासय गंगरेल बांध म आज प्रदेस के सबले बड़े जल महोत्सव के सुभारंभ होंगे। जल जगार म आयोजित अलग—अलग गतिविधि के बीच अंतर्राष्ट्रीय जल सम्मेलन के पहलइया दिन देस—विदेस के नीति निर्माता, पर्यावरणविद, विशेषज्ञ अउ राष्ट्रीय अंतर्राष्ट्रीय संस्था मनके प्रतिनिधि जल संचय अउ जल संरक्षण उपर संवाद करत हे। ओमन जल संचय अउ जल संरक्षण के महत्व ल रेखांकित करत हुए अपन—अपन क्षेत्र के सफल काम मनके कहानी घलो साझा करत हे। जल संरक्षण के प्रभावी उपाय उपर गहनता ले विचार विमर्स करे के संगेसंग धरातल म उतारे के कार्ययोजना घलो तय करे जात हे। सम्मेलन ल प्रसिध्द पर्यावरणविद पद्मश्री पोपट लाल पवार, श्यामसुंदर पालीवाल अउ उमाशंकर पाण्डेय, अर्थशास्त्री अउ सहरी विकास विशेषज्ञ, प्रोफेसर अमिताभ कुंडू, केंद्रीय कृषि अउ किसान कल्याण मंत्रालय के अपर सचिव डॉक्टर मनिंदर कौर द्विवेदी अउ केंद्रीय जल सक्ति मंत्रालय के अपर सचिव अर्चना वर्मा ह संबोधित करीन। सम्मेलन म यूनिसेफ, जापान, श्रीलंका के अलावा देस भर के जल अउ पर्यावरणविद एमा भाग लेवत हे।

सम्मेलन के दौरान आजीविका महाविद्यालय धमतरी के टूरिस्ट गार्ड सदस्य माधव सिंह ह वाटर बैलेंसिंग स्पोर्ट्स म भाग लेके जल ओलंपिक के सुरुआत करीन। ओमन गंगरेल के पानी म बनाय गे बैलेंसिंग स्ट्रक्चर म लहर के बीच चलके दूनो हाथ ले समन्वय बनाय के प्रयास करीन। ए कारीकरम म जल ले संबंधित कयाकिंग, स्वीमिंग, बनाना राईड, फ्री स्टाईल स्वीमिंग, फ्लैग रैन, थ्रो—रो अउ रीवर क्रासिंग जइसे प्रतियोगिता होवत हे।

सैन्य-प्रदर्शनी

राजधानी रायपुर म आज ले सशस्त्र सैन्य प्रदर्शनी सुरु होंगे हे। साईस कॉलेज मैदान म आयोजित ए प्रदर्शनी के सुभारंभ आज मुख्यमंत्री विष्णुदेव साय ह करीन। भारतीय सेना डहार ले आयोजित ए सैन्य प्रदर्शनी म टी-नाइटी भीष्म टैंक, वायु रक्षा प्रणाली लाईट फील्डगन जइसे युध्द के दौरान इस्तेमाल होवइया आधुनिक हथियार अउ उपकरण मनके प्रदर्शन करे गीस। प्रदर्शनी के दौरान सैनिक मन डहार ले पैरा जंपिंग, खुखरी डांस, डेयरडेविल मोटरसाइकिल राइडिंग अउ घुडसवारी के घलो प्रदर्शन करे जात हे। ए प्रदर्शनी के उद्देश्य लोगन मन ल भारतीय सेना के क्षमता अउ कौशल से परिचित कराना आय।

समारोह ल संबोधित करत हुए मुख्यमंत्री साय ह किहीन कि भारतीय सेना अपन अद्वितीय दक्षता अउ अनुशासन बर विश्वभर म प्रसिध्द हे। जब-जब देस म संकट आय हे, हमर सेना ह दुश्मन मन ल मुंह तोड़ जवाब देके देस के रक्षा करे हे। कारीकरम के अध्यक्षता विधानसभा अध्यक्ष डॉक्टर रमन सिंह ह करीन। ए मउका उपमुख्यमंत्री विजय शर्मा, लेफ्टिनेंट जनरल पद्म सिंह शेखावत अउ ब्रिगेडियर अमन आनंद घलो उपस्थित रिहीन।

श्री साय ह ए प्रदर्शनी ल एक दिन अउ आगू बढ़ाय के घोसना करे हे। अब ए प्रदर्शनी सात अक्टूबर तक चलही। ए प्रदर्शनी बिहनिया आठ बजे ले दस बजे तक अउ संझा छै बजे ले रात आठ बजे तक आम नागरिक मन बर खुले रइही। ओमन यहू किहीन कि अवइया बछर म घलो सशस्त्र सैन्य प्रदर्शनी के आयोजन करे जाही

माओवादी—मुठभेड़—01

नारायणपुर जिला म सुरक्षा बल अउ माओवादी मनके बीच काली होय मुठभेड़ म इकतीस ज्ञन माओवादी मारे गेहे। सबो माओवादी मनके सव बरामद कर ले गेहे। अभी ले कुछ देर पहिली दंतेवाड़ा म होय एक ठन पत्रकारवार्ता म बस्तर रेंज के पुलिस महानिरीक्षक सुंदरराज पी. ह बतइन कि काली नारायणपुर दंतेवाड़ा के सीमा म दक्षिण अबूझमाड़ इलाका म होय मुठभेड़ म मारे गे इकतीस ज्ञन माओवादी मन म पंद्रह ज्ञन के पहिचान होगे हे। ए माओवादी मन उपर एक करोड़ तीस लाख रूपिया के इनाम घोसित रिहिस।

मुठभेड़ के बाद घटना स्थल ले एल.एम.जी. रायफल, एके—फोर्टी सेवन, एस.एल.आर., इंसास अउ कैलिबर रायफल के अलावा कई ठन दूसर हथियार बरामद करे गेहे।

इही बीच, मुख्यमंत्री विष्णुदेव साय ह पाछू रतिहा मुठभेड़ के घटना ल लेके उच्च स्तरीय बइठका लीन। बइठका म श्री साय ह घटनाक्रम के विस्तार ले जानकारी लीन अउ माओवादी मनके खिलाफ सफल ऑपरेशन ल लेके सुरक्षा बल के सौर्य अउ अदम्य साहस के सराहना करत हुए उन ल बधई दीन। मुख्यमंत्री ह पुलिस महानिदेशक ल माओवाद के खिलाफ ढिलाई नइ बरते के निरदेस देहे। संगेसंग ओमन जवान मन ल जरूरी संसाधन के व्यवस्था सुनिश्चित करे बर किहीन। श्री साय ह बइठका म स्पष्ट केहे हे कि राज्य सरकार छत्तीसगढ़ ल नक्सलवाद ले मुक्त करे बर दृढ़ संकल्पित हे।

उहें, मुठभेड़ म घायल एक ज्ञन जवान ल राजधानी रायपुर के एक ठन निजी अस्पताल म भर्ती कराय गेहे। उपमुख्यमंत्री अउ गृहमंत्री विजय शर्मा ह पाछू रतिहा अस्पताल पहुंच के घायल जवान के हालचाल जानिन।

माओवादी—मुठभेड़—02

ओति, केंद्रीय गृहमंत्री अमित शाह के अध्यक्षता म अवइया सात अक्टूबर के नई दिल्ली म नक्सलवाद के मुद्दा ल लेके नक्सल प्रभावित राज्य मनके मुख्यमंत्री अउ गृहमंत्री मनके उच्च स्तरीय बइठका प्रस्तावित हे। ए बइठका म मुख्यमंत्री विष्णुदेव साय घलो सामिल होही। बइठका म मुख्यमंत्री राज्य म माओवाद के खिलाफ चलाय जात ऑपरेशन अउ नक्सल प्रभावित क्षेत्र मन म चलत विकास कार्य मनके जानकारी दीही।

युवा आयोग अध्यक्ष—पदभार

छत्तीसगढ़ राज्य युवा आयोग के नवा अध्यक्ष विश्व विजय सिंह तोमर ह आज रायपुर के युवा आयोग कार्यालय म पदभार ग्रहण करीन। ए मउका म उपमुख्यमंत्री विजय शर्मा के संगेसंग मंत्री रामविचार नेताम, केदार कश्यप, टंकराम वर्मा अउ आने—आने जनप्रतिनिधि मन उपस्थित रिहीस। ए अवसर म श्री तोमर ह किहीन कि छत्तीसगढ़ राज्य ल विकसित बनाय म युवा मन के महत्वपूर्ण भूमिका रिही, ए उद्देश्य ल लेके युवा मनके सहभागिता ल सुनिश्चित करे के काम करे जाही।

ठग—गिरफ्तार

सक्ति जिला के मालखरौद पुलिस ह फर्जी भारतीय स्टेट बैंक संचालित करइया अउ नौकरी लगाय के नाम म ठगी करइया मुख्य आरोपी ल गिरफ्तार करे हे। पुलिस ह बतइन कि आरोपी अनिल भास्कर सारंगढ़—बिलाईगढ़ जिला के ग्राम दुमहानी के रहइया आय। उंखर करा ले एक ठन कार अउ तीन ठन मोबाइल जब्त करे गेहे। उहें, बैंक खाता म रखे तिरासी हजार रुपिया ल घलो जब्त कर ले गेहे।

हल्बी / गोण्डी—समाचार बुलेटिन

सुनइया मन ल बतादन कि काली ईतवार के “हल्बी” अउ “गोण्डी” बोली म समाचार बुलेटिन प्रसारित करे जाही। ए दूनों बुलेटिन आकाशवाणी केंद्र, जगदलपुर ले प्रसारित होही। जेला बस्तर संभाग म ही सुने जा सकही। हल्बी म समाचार बुलेटिन बिहनिया साढ़े सात बजे ले अउ गोण्डी म समाचार बुलेटिन संझा साढ़े छै बजे ले प्रसारित करे जाही।
